

*cis studiosi. Caterum, si omnia constarent, illud non esse negligendum, quod Æstensis Hercules præter excellentes ipsius in re militari virtutes, duorum potentissimorum Regum pernecessarius esset: procul dubio alienis illum stimulis incitatum, non sua sponte ea jampridem moliri: constare ad id, multos Italiae Principes cum eo fœdus percussisse. Quod quum ita esset, viderent illi, qui bellum tantopere cupiebant, ne magis clypeo, quam gladio indigerent. Ad ea maxima pars Senatus, ut quisque ferocissimus erat, reclamare: Non esse ob ea, quæ a timidis afferrentur, ulterius injuriam ferendam: insultaturos unius exemplo alios finitimos Principes, immo de industria quæsituros, qua ratione Veneti imperii fines inquietare possint: Nec verendum esse, ne civitas non omne belli onus sustinere valeat; quippe quæ jam diu armis assueta, ne concessum quidem ocium sit latura. Esse præterea Dei benignitate Venetas opes tam validas, ut quamvis Othomanico bello ingens auri pondus esset effusum, adhuc longe majus ac pene immensum superesset, quo vel gravissimum bellum, ac longe gravius eo, quo nuper defuncti essent, ex imperii dignitate confici posset. Patere ad hæc civibus longe lateque maria ad mercaturam; vectigaliaque in dies & portoria meliora fieri. Quid quod multi ex senatorio ordine adessent, qui se magnam vim auri ad usum Reipublicæ in medium collaturos pollicerentur; quibus appareret stipendium ad quantumvis magnos exercitus alendos non defuturum. Nec Pannoniæ Regis motus aliquo modo formidari oportere: qui præter quam quod cum Fœderico Imperatore perpetuum gereret bellum, Turcos quoque infestissimos haberet, qui ejus fines incursare, popularique non desinerent: Satis superque illum habiturum, si adversus potentissimos hostes Pannoniæ fines tueri possit. Nec multo plus illo Ferdinandum metui debere: quippe qui vix bene adhuc ab Hidruntina respiret obsidione, qua pluribus mensibus terra marique occupatus, post ingentem auri hominumque jacturam, littoralem urbem a barbaris ægre recepisset: Infestaturam ad id Venetam classem maritimam Appuliæ & Calabriæ oram:*